

**Siunissami aammik akuluiartittartut sapinngisamik amerlanersaat Nunanitsinni isumagineqartarnissaat pillugu qanoq iliuusissamik pilersaarummik Naalakkersuisut suliareqquneqarnissaat pillugu Inatsisartut aalajangigassaattut siunnersuut. Qanoq iliuusissamik pilersaarut Inatsisartunut kingusinnerpaamik UPA 2015-imi saqqummiunneqartariaqarpoq.**

(Inatsisartunut ilaasortaq / Medlem af Inatsisartut Mimi Karlsen, Inuit Ataqatigiit)

### **Akissuteqaat**

(Peqqissutsimut Attaveqarnermullu Naalakkersuisoq Steen Lynge)

### **Aappassaaneerinnineq**

Aammik akuliaasernerup tiguneqarnissaanut iliuusissatut pilersaarutip suliarineqarnissaa pillugu siunnersuut pillugu ilaasortaq qutsavigeqqikkusuppara.

Aamma siunnersuutip sukumiisumik oqallisigineqarnera pillugu Inatsisartunut ilaasortat qutsavigaakka.

Inimi maani oqallinnermi aammik akuluiartittartut H-mik akuluiartinnissamik (aakkut akuluiartinnissamik) pisariaqartitsinertik pissutigalugu pillugu Kalaallit Nunaanni suliarineqarsinnaanngitsut amerlanngitsut atugaasa pitsannorsarnissaannik soqutiginnittoqartorujussuunera takutinneqarpoq. Ilaatigut Kalaallit Nunaannut sulinngiffeqarluni angalasinnaanermut periaaserisaq oqallisigineqarpoq. Oqaluttuarisinnaavara Dronning Ingridip Napparsimavissuani tartukkut nappaatinut nakorsaaneq Rigshospitalimi nakorsat suleqatigalugit tamassumunnga periarfissat misissulereernikuugai.

Peqqissutsimut Pitsaaliuinnermullu Aqutsisoqarfiup periarfissat nutaat H-mik akuluiaasernerup tiguneqarnissaanut piviusorsioertitsilersut pilerinarsititsilersullu ingerlaavartumik malittarisarmagit Naalakkersuisut isumaqarput immikkoortumi iliuusissatut pilersaarusiornissaq pisariaqartinneqanngitsoq.

Tamanna tunngavigalugu siunnersuutip itigartinneqarnissaa Naalakkersuisut inassuteqaatigaat.